

四庫全書

集部

欽定四庫全書

集部

西河集卷一百八十四至
七

詳校官編修_臣曹城

助教_臣常循覆勘

總校官庶吉士_臣倉聖脉

校對官編修_臣馬啟泰

謄錄監生_臣姜也魯

欽定四庫全書

西河集卷一百八十四

翰林院檢討毛奇齡撰

七言排律

沂大江泊桐君山下作

大江直上沂新安為愛桐君繫纜看幾樹綠蘿懸露濕
半林黃葉帶霜寒三時水嶼迷烟市萬疊秋山漱錦湍
發宿影含書閣曉淅潮聲傍釣臺寬帆檣估客歌黃淡

橘柚人家翦綠團花種上城懷杜牧草環故宅問方干
紫巖洞口雲猶閉烏相門前雨未乾丘壑儼然羞豹隱
江山如此笑龍蟠望中未覩雙峰澗去後應過七里灘
繡石障村真足羨仙棊布地有誰觀滔滔水國憑雙槳
泚泚天涯負一竿那信戴顓還到此雙柑斗酒暫盤桓

過上海訪任待菴明府有贈

遙從滬瀆訪琴臺二月春風海畔迴地僻乍驚新候轉
官貧不厭故人來陶家秫向年前釀潘令花從雨後栽

成堞但教懸畫鼓訟庭真見鎖蒼苔祥鸞欲下知為瑞
斥鷃相過不用媒客至歡然炊綠黍兒時苦憶弄青梅
平津布被仍聯袂季子羊裘未振埃三載有懷方就日
四郊作誦已如雷屬車私喜陳琳在高宴將為司馬開
坐見徵書來北闕賦成祿養是南陔龐公豈藉銅章顯
田鳳終推錦帳才同學暮年應見少青衫相對且徘徊

贈周雪客

大梁公子最翩翩執手丹陽柳樹邊三俊豈能遺顧彥

一經長得嗣韋賢庭餘北海樽中酒家鮮司農肘後錢
久別愧無蘭芷珮相逢正廢蓼莪篇南征濫入青雲幕
北去還停白下船遮莫東田留舊咏風流終賴彥倫傳
錢聖楨招集湖舫分韻得齊字

冬晴佳氣滿湖堤况復賓朋儘可攜共道主人饒玉醴
何期公子出金閨

謂佟觀察公
子伯仲也

巖邊秋葉飛將盡山半

朝烟收未齊曲舉並投蕭寺北
檣舟先在斷橋西
平臯坐去還留簞老友逢來總杖藜
祠下幔竿堵綠漆道傍

亭子築紅泥隔林見石蹲如鷺隱舵看山臥似猊風緊
背嘗遮柳橋年高齒不任薑鹽酒因談勝當脣落歌為
箏煩到耳迷挿漢露披青齒菖翻波日射碧琉璃樊成
官藥方祛馬席換仙庖且臞鷗主客豪都成鳳舉弟兄
愚轉媿雞栖家樺黃會
僕俱在坐晚涼錦帶吹逾薄夕照雷峰看
漸低誰謂蒼茫歸路遠錢唐門外有招提

三月三日臨江官署褰飲二首

臨江官閣啟江濱上巳銜盃對夕曛才子風流吟麗日

使君高興入青雲沿流疑泛桃花下滿署爭傳蕙草熏
舞柘偶然來捧劍披茅無處不湔裙諸公洛下隨王宰
千載蘭亭想右軍獨惜暮春遊子淚每從佳節倍紛紛

二

桃花壓郡傍江開飲袂還登江上臺朝雨甫隨帷句捲
春潮似逐羽觴來前亭聽伎歌初發別座論文酒莫催
日出花寒猶集霰是日午後雨霰堦前草長為驚雷九龍原屬
徵賢宴三日慚無應詔才何幸天涯重依倚將離未贈

且徘徊

臨平別潘廷章一十六年旅舍揀得所寄西陵

曲哀思妙麗感生客心因為賦述且志鄙憶

臨平村館夜蕭蕭春雨連江泊畫橈別去遽如雲外雁
思深長逐暮歸潮十年遠道寒荷葉一夕高樓對柳條
羈客懷家新篴筍美人報我舊瓊瑤西陵曲好紫沙路
東海鞭難渡石橋苦憶潘郎才藻美相尋無那夢中遙
客中寄姜司諫以京卿候補都下

十載承華侍從臣還來闕下待絲綸早推當代端圭彥
猶是前時諫獵人起草尚濡兩省翰看花時埽六街塵
留賓夜永開東第少輔星高近北辰火藻繡成衣照眼
山桃剪合綬垂身懷予屢寄曹王劄知己誰操郢匠斤
異地望迴卿署月同遊記得客年春賀循久喜能逢晉
張祿原來未入秦倘使故宮通碣石敢忘高閣在平津
過汝寧奉贈金太守鎮一十四韻

郎官出守本風流况復雄藩是豫州下吏盡如新息長

專城原屬富波侯九田作賦推中等千騎看君居上頭
招得牛醫來館舍夢將女子渡河洲高車拔地熊隨軾
翠羽當風隼作旂自愧攀轅河上過真成躡屩潁中遊
桑花製酒村前醉蒲葉如鞭澤畔抽宿堠頓驚茅店曉
八關剛值木陵秋無才豈敢依羊陟八耳唯聞誦賈彪
大府此中猶露冕思鄉何處更登樓晚來擇木烏無定
春到遷枝烏有求三老懷錢終自獻十年借冠恐難留
他時列檠霜垂戟此日褰帷月在鈎但願屢攜青鵲印

終然一御黑貂裘

以詩代札懷復沈九嗣范秘書

一從把袂分淮市幾次封書出禁闈
結綬肯思黃叔度行吟空憶謝元暉
憑誰極浦題青草愛爾分曹對紫薇
仁壽鏡邊搖綵筆上闌花裏賜宮衣
徒聞西掖鵷鸞隔又見南園蝴蝶飛
太史芸臺行處少仙人蓬島會來稀
安丘避地歸何得剡曲移家願屢違
便有黔婁貧到死莫嫌方叔苦猶饑
院中容易推高第吳下終難定少微

已分名王無自違暫逢賢守且相依

時予依汝南金使君署

故交

遠道還貽綺久在他鄉敢佩韋但詠玉堂懷友句不知
珠淚向誰揮

題無錫縣麗譙樓十二韻并呈吳明府

吳關千里擁神京猶有層樓倚太清
裨海近環分楚越
大江東下控蠻荆
雕楹疊起連虹度
畫角重開映漢明
一曲謳歌闌闌地
萬家烟火闔閭城
按圖複道年來聳
懸鼓當門夜不鳴
碧水有湖宜晷畫
青山無錫自銷兵

窻中鳥雀穿簾過棟裏雲霞入座生喜共仙人閒着鳥
愁聽玉女細吹笙題來文杏垂秋露看去官花照晚晴
落日暫登思縹緲凌雲欲賦氣縱橫彤廷久已無南顧
彩筆何煩寫北征但得從君頻騁望漢宮高掌在金莖

同諸公飲劉四廷冠柚園八韻

素蓋西園集勝游玉缸初發雁來秋當筵喜見環林柚
滿案愁看剝石榴並坐佳人彈錦瑟十年羈客擁烏裘
酒中惆悵孫馮翊天下英雄劉豫州意氣漸深交履舄

主賓不住錯觥籌時聞薌澤同烟梟倒瀉金波漾日流
欲上山亭舒望眼重翻水調換歌頭也知龍澗須遷飲
爭奈鴉棲不可留

春行自東城迤北郭到北幹山脚悵然有述

春城無處不留連北郭晴光最可憐數里川原初過雨
萬條楊柳盡生烟到來祠廟開山麓望去人家倚墓田
荒縣麗譙傾未復空壇華表豎依然草頭喜見飛蝴蝶
樹裏愁聽叫杜鵑半嶺行過昏舊徑隔溪流出是新泉

頻縈道左將顏苑偶泛村南不繫船
斥堠橫沙連大漠
郵亭高嶺列諸天
登臨悵惆違時俗
詩句蕭條念昔賢
燦曰古詩蕭條北幹園
長願棲遲歸十畝
不虞兵革陞多年
新經無復聽松地
故老猶傳伐木篇
但得閒行餘我在
那知春色向誰邊

奉贈姜掌垣內轉候闕歸里并覲

幾年起草重明光
十載思書出尚方
超級暫應辭虎陛
鳴鞭久已振鵷行
覲庭舞綵紆蒼綬
里社簪花拂皂囊

歲減數千餘諫紙函留七十二封章霜蹄歸沫追張湛
白筆數詞過謝莊戲藻看魚分太液棲梧有鳳在朝陽
兩垣舊第開丹幃五月新荷抱綠房幼度尚思朱雀里
王褒曾返碧雞坊璆珂響曳中朝履襜被風傳侍女香
一室競將窺武庫三旌虛起待文昌纘戎誥出尚書省
祿養歡承水部郎內寢自調瑤作膳上邽真見錦成鄉
蜀車前負郎官弩衛國終登僕射牀他日早膺華殿詔
為君重舉泰階觴

遇高詠蕭江幕府

高子相逢碧嶂春可憐
白恰焰花新同為江畔登臨客
猶是天涯骯髒人
官閣夜燈彈瑟調山亭曉樹接車茵
文成鮑焰還依楚窮似張儀
未入秦兩鬢風霜交欲墮
十年湖海一相親
難忘幕下題詩日
莫負城南載酒辰

二

宣城久念玄暉句
江上栽聯郭泰船
望去故園芳草外
歌來寒食落花前
青山築室期何日
白眼看雲入暮天

河內再游成鳳舉金陵一曲恨龜年

高有金陵行傳世

定交愧

乏公孫紇贈我哀如蜀國絃那得移家還就汝敬亭山

下共流連

譙崇仁官署同陳石麟進士劉尊汪懋勳諸孝

廉呈駱明府

茂宰官衙倒玉壺嘉賓襟坐佩銀鋸風流不數潘懷縣
才子原推駱義烏江水天然開玉液地衣霜映似金鋪
筵前高論騫鴻鵠燭下新妝舞鵬鵠疊幃盡書三壽詠

時座張太夫人壽幛環林如畫十洲圖殘弦已墮天邊月寒葉還

吹井上梧鄴下友朋懷讌樂茂陵車服愧閑都感深廁

末猶蒙顧醉倒塔頭不用扶秋去宋生悲結軫年來阮

籍畏窮途那知江畔逢良會仍是天涯舊酒徒

廁之坐末為廁

末

元夕觀燈同徐二十二嗣定作

每逢三五憶當年況復春燈在眼前曾向上元追唱和
誰能此夕不留連江城薄暮開瑤市地主中宵列錦筵

一道長衢鋪月色萬條寶炬動星躔
熒輪焰轉爭疑電
火簫花生并是烟掛樹密教朱鷺集穿街遙見燭龍眠
千枝繡幃圍羅綺百變新聲入管絃
妓宅飛香矜鴛鴦
軍人合樂奏于闐環橋散立長明樹
啟署渾如不夜天
未有金吾防鎖鑰從看玉女下車駢
光分衛玠停珠勒
暗裏羅敷落翠鈿戴去黿身橫碧海
擎來龜足踏紅蓮
沿流訝向波中見繞堞驚從天際懸
神象舞餘閒憂齒
村童逐處笑摩肩但聽東邸留歡曲
未和南樓應教篇

潛入平津觀秘戲記于故國醉燈船良辰屢惜吳關杳
好友多逢楚水邊斗轉漢回人散後踟躕獨立倍淒然

九日臨川獨酌有感并寄徽之大敬南士

誰言霜雁經年返又見黃花九日開天半寒風吹木葉
土中無射動葭灰愁登建武飛猿嶺深憶彭城戲馬臺
前歲曾觀盱水去今年重滯幕江隈已聞羊叔留碑待
何處王弘送酒來蟋蟀詩中三致慨茱萸亭下一銜杯
游無江夏叅軍興人負臨川內史才藥市神仙壺裏臥

柳家嬌女陌頭回
宅鄉獨對寒林酌
故國疇將錦字裁
不識青山從眺望
可能皂帽共徘徊

客於淮陰過漂母祠下悠然感興倣長慶長律
以抒牲仰懷之情

淮水湯湯赴海門
淮陰城下一孤村
東流不斷長淮水
淮上長祠漂母寬
當日水濱來擊絮
曾于此地餉王孫
高情豈望千金報
雅意難忘一飯恩
志士有時丁晦塞
丈夫何處假涼溫
我行避地全無著
人事它鄉安足論

落日偶然祠下過，傾臺依舊水邊存。
蘆花淺瀨沉沙岸，蔓草荒碑臥土墩。
白日西馳風勢緊，黃河南下水流渾。
關漕鼓發如鼉吼，估舶帆收似蟻屯。
柳根穹接上潮痕，一時感爾名千古。
再拜呈予酒一罇，韓信尚憐無所藉。
劉安那復自言尊，舟車官客從澆醑，
燈火鄉民效駿奔。唯我遠懷烟水外，
踟躕獨立到黃昏。兀庵節崑崙庵同集淨土放和尚許各賦詩見

懷奉峇長律一十二韻

遠師初住虎溪邊便集廬山十八賢雲外共尋溪口寺
雨中偏到渡頭船解開經素叅堂轉罩得燈紗對榻眠
擊鉢舊過祇樹嶺燒鐺新煮落花泉年多不記安禪偈
夜靜重吟懷友篇宛轉說憑龍女聽殷勤書向獵人傳
違時未得紆塵軫此日還留出世緣德士總教頻指月
習生從此媿彌天翻來字裏藏金葉諷去聲中現法蓮
為擬和章時隱几因知得句定忘筌門同臨濟原無別
路隔恒沙豈易連縱有餘霞能問訊碧溪負杖在何年

晉安朱氏新闢山園築臺飲次索題一十九韻

初闢山園笏地開
傍崑高處築層臺
一城烟火衝檐出
萬疊雲山入座來
書幌筆床閒拂拭
酒鎗茗碗費安排
欄邊薜荔因風發
牕外芭蕉帶露栽
石榻就崖留枕簟
壁幙連檻羃罍罍
鄰牆低見雙抽笋
曲磴斜懸一樹槐
吟罷呼兒頻洗墨
興來招客共啣盃
市將梁甫銀泥餅
瀉盡滎陽土室醅
蒲底翻波烹雉汁
盤間飛雪膾魚胎
藍超洞訝丹花接
歐冶池尋碧水隈
天際撲還蕭寺影

兩餘圖作米家堆面當幔柱鋪空翠背觸垣衣落繡苔
絕巘晚來堪倚徙隔坡時過得追陪每因適意多開牖
不為逃名更鑿坏愁見碧霞徒散去閒看白鳥自飛回
十年隱豹難藏霧五月喧蚊好避雷境僻暝含衣上月
地高寒洗屐頭埃披襟不減臨三島引領何須遍九垓
但得名賢同嘯咏且留此地暫徘徊

過雲門謁佺亭和尚同姜京兆將平階張杉二

十二韻

雲門高峙鑑湖濱乘興同來一問津
慶緒久爲方外友陶潛原是社中人
到時山葉銷寒色望去蓮花結勝因
千載門庭渾不改四圍丘壑宛相親
行隨過客朝華藏坐見空王轉法輪
高閣齋鐘敲處遠長廊粉壁畫來勻
方開玉篋探三果願借金泉洗六塵
驚拜偉長徐繼恩如隔世悔言智永是前身
他方遠道言歸晚何處相違不計春
話向劫前頻似絮髮從剃後散如銀
拂衣早得完婚嫁作賦猶能動鬼神
蓋世覺場樓道一當年捨

宅想王珉前朝遞勒黃絲字後院曾邀白氎巾船載溪

風憑往復石遮山雨最嶙峋

樵風湮石
傘任寺側

門前牛馬馱經

慣林下烏鴉念佛勤象寶鑄為阿育女龍牙貢自海波
民秋深土鉢盛紅稻午過香厨供綠芹聽講喜追山魃
至放生徐見水鷗馴宰官就訊同殷浩居士當叅得許
詢擲塵談玄殊自暢卓錫無地豈全貧曇闢再啟知逾
晉桃樹初栽為避秦但使下方能假憩誰言至德定無

隣

奉呈益都相公生日二十韻

黃扉曉闢日初暹瑞靄忻從

帝座覩五會星辰雙闕現一天雨露萬家霑致君久已
如公與薦士從教識杜淹但典冊書先國史每因講席
領宮詹班迎龍鳳池邊揖名向琉璃盃內占平見台階
揚玉燭驚傳宮漏下銅籤入朝每帶蕭何劍上殿曾垂
鍾傳幃香草紉針堪補袞空桑負鼎為調鹽千盤鶴醢
將安飾十載狐裘未是廉例簿却程追寇準祖庸變法

笑楊炎分屏宛見三旌列
惜笏多為百辟瞻上秋禮同
河嶽貴下賢意比地山謙
文隨泰始開林圉樂奏昇平
度里閭徼外問安爭啟
愜車前白事不隨簾金鱗在榜
應傳鉢寶軸盈箱盡賜
縑撤到碧闌連霧捲判來紅押
帶花箱圖形豹尾縱橫接篆蹟
螭頭顛倒粘肘後錄憑
錢氏授海中籌共子房添年踰
單豹才方壯位進非熊
志未厭莫道耆英纔視杖格天
大業早能兼

戊午九月予謬以入薦赴都奉謁李學士蒙賜

晉接兼屢有請召陪侍讌集謹賦長律一十

六韻志謝

東堂學士愛才賢
蟠木何曾有物先
時接豎儒鼃禁外
晚開高閣帝城邊
買臣無復將車興
曼倩剛逢待詔年
失學偶膺三府辟
空羣竟遇九方歎
虛疑白璧終投楚
不道黃金尚在燕
暗解蒯緱歸幸舍
驚看毛鼎列長筵
和成春芍芬于木
摘得秋花小似錢
幕後徐呼賓從出
楣間高見

御書懸近欄竹石皆仙署滿架縑箱有賜籤坐觀趨庭

迴玉樹行逢撒燭散金蓮春坊詩本徐摛授左相經從

韋孟傳

時大令新登賢書中庶惠見

高語任傾千葉漏醉歸難控五

花鵜感深嘉意增留戀賸有微情荷採甄幾度謬陪瑤

海晏平時況誦柏梁篇彤雲遠覆珠幢下淑氣遙吹香

案前但使

聖恩能汎被從君乞放五湖船

雪中八直史館即事十韻

朔風吹捲御河沙早見天街散雪花苑外撲將千片蝶
壇深噪過幾羣鴉遶成翠帳疑朝雨望去紅牆似曉霞
誰賜錦貂還左掖獨騎羸馬上東華人逢玉署忻投壁
身在銀河未汎槎隔院冰敲懸幕鐸傍檐糝落濕牕紗
驚心鎮自燒青簡呵指真難草白麻渴至未傾杯底酪
寒多先結硯頭窪宮臺嵒巢依天近輦道迴環歸路賒
一望蒼茫愁思遠東安門外即天涯

王師收復成都

詔集百官于午門外宣捷紀事十五韻

凱奏初宣曉漏清
王師收復錦官城
春還玉壘堪傳檄
水下瞿塘會洗兵
已報王均逃廣漢
先教鄧艾取陰平
統軍不待徵龍武
要路曾經過馬鳴
劍閣雨寒朝出棧
草堂花暖夜連營
降旗江漢風俱動
積甲峨嵋雪漸晴
喻教久當開梵道
樓船從此破昆明
歸心似附千官影
稽首猶聞萬歲聲
六詔烽烟將寢息
兩階干羽自縱橫
星纏太華看歸馬
日出平臺好晾鷹
聽去銀笳穿玉峽

望來銅柱象金莖帳前有客能摩盾闕下何人更請纓
劉關不甘為副使韋臯豈便是書生恢疆大略需威克
告廟雄文在武成欲識已渝何處舞但看鐃吹滿神京

寄贈柏鄉相公生日一十四韻

元臣復辟已多年歸臥東山興渺然

天子久思黃髮侶都人猶誦袞衣篇集賢里第需裴度
通德鄉門屬鄭玄賜杖不因酬赴闕著書豈是記歸田
兩朝盡瘁餘鐘鼎千聖相逢在几筵靜裏有籌還借箸

閒來得句已忘筌
鉏耒隴上當牛喘
煮藥階頭共鶴眠
永夜看星嘗傍斗
隨時掣電笑如椽
談深總落珠盤裏
詔密曾聞玉案前
連歲歉虞民力竭
歷年高受

主恩偏中山
蹋盡蕭何履
灤水通將范蠡船
廢劄欲焚
開兩甕
緼袍難值到千錢
金籬遺得韋家教
玉樹多于
謝氏賢
祇為赤松游
太早一觴長寄海雲邊

西河集卷一百八十四

欽定四庫全書

西河集卷一百八十五

翰林院檢討毛奇齡撰

五言格詩一

七夕集兩水亭賦詠成篇

金風扇微颺玉律回迅商良朋邁嘉節言讌君子堂廣
厦延樹色敞牖生雲光中廚敕佳餚肆列園以方燿鵲
間芍汁捫馬逾蘭漿雄談振林莽能使煩氣涼茲辰度

靈匹歷歲旋河梁暗忻蛛網合明見烏鵲翔所愧守恒
拙偃蹇無文章何期覲雙儀惠我同七襄生人重高會
慷慨啣清觴但當保修期終古以為望

入史館奉和監修先生赴

召東同館諸公原韻三首

隆古重籍氏仰視樞東辰宣尼起嗣之寄志在獲麟前
代多政記宛若眉列陳國書過激厲其事反以湮

大君秉遐照丙穴觀細鱗美劇嗣元宋安問秦與新一

時競橐筆群策堪扶輪如何稽古疎有覲稱史臣愚賈
闕寶玉哲匠迷荆榛所恃綸閣暇數畧凡再巡埽翳見
白日披巾對高旻追隨蓬山顛灑濯瀛海濱空言啓石
室將以傳其人終慚識未優誰得資討論前賢誦崧嶽
所重惟生申况當天門高下視羅八垠

二

有明十七君作聖述亦賢順始復順終遂歷三百年八
垓被鴻濛重譯及毳旃斯蹟既已陳所幸留簡編得失

炯前鑒開館加窮研勝代雖遙遙相接猶几筵其中升
與降疇則相糾虔實賴司衮學引作庸衆先靈料展雲
霧躡螭方同緣記盛時自速努力咸仔肩何必新唐書
修在慶歷前

三

伊昔致治朝時政早論紀纂列無闕遺一若左右史降
此多從諛展轉互相委虛實亦已淆遑問非與是况當
革命時館載乃頓已何期

聖代興三恪備中旨加以春秋法凡例共摩擬司衡既
禮絕模楷責下士宛如百車轍相率遵一軌儻云具三
長端在集衆美惟恐同異生筆削翻有俟作文無發明
徃與穢濫比庶句監正之三寸竹毫子

月蝕詩

季秋月丁未望日日將暝太陰在降婁不輯于奎觀維
時酉初刻里燭方進薦奉常啓瑤壇糞地以為墀堂槐
挺當門遮出白羽扇睨仄慙間驟爾丁物變啄齧惟

鳥喙涎蝕類蟲玩螭令瞻視乖側目不忍睟先王有常
箴百執謹天變宗伯統列卿伏地作哀戀靈鼓五十雙
轟擊儼鬪戰奔走逮嗇夫禮拜及下賤須臾雲生掩
過十之半明質頗銷鑠魄色雜紺縹餘光射輪出迸裂
過飛電相視驚閃動有似金任鍊祇疑齧錫餅中界等
絃線地形與日虛兩兩不相券金牌汎銅盎玉漏瀉銀
箭如何哉明時入濁竟不見光復翳漸除災去神已遍
君子省僞尤頻首矚河漢

秋涼飲酒詩和馮夫子韻

涼風吹西堂秋日亦灑灑在墅有謝公下坐及裴楷絃
誦代絲竹童冠列慧駉高懷浩然興微語渙以解作技
任衆長觀場笑予矮譬彼黃金臺駿骨亦可買況當炎
蒸餘暑退氣稍愔水潦收前池林花覆高嶺中厨飭修
餉薑韭紛布擺誰道鱸魚鮮此鯉出徒駉暗撫大食刀
雙環總精錯

洗燕泥詩

和宗元
鼎作

紅英發新條碧柳啣初稊
翩翩雙燕子宛轉覓宿棲
雨中啄土梗日出捎牆衣
一朝秋風來東西相背飛
閒堂張委幔層裯設重緹
巢虛易傾危壘仄難扶持
常恐墮瑤席落索成汙泥
因此感嘆生攜盤滌櫨
枿紅襟罕陳跡翠羽亦虛儀
寄言韶華子不潔安可遺

遙題雪舫禪師山閣冊子用澄園馬居士韻

曩予陟三竺一過西林僧
朝簾掛石闌晝火圍紗燈
云有般若臺眇向松間登
白雲一回首相望空層層
十年

羈京洛蹠馬如凍蠅史輯今共古抄付掾與承今來住
明湖雪舫嘗見稱目為青林馳心與滄海澄生世苦奔
涉何年斷糾繩長嘯空巖間谷遠聲自應

湖舫陪臧內史喟亭飲次採蓴兼送其還京即

席和內史原韻

晚春風物和良日恣幽探湖波沲還平隄草綏且蓼蠶
老桑葚落雨過鶯語酣入寺問劉逸放鶴尋蘇耽山行
幸追隨所至供伏幽霧散雨未接日漏光猶含共言南

湖濱芹藻勝蔭庵中有雉尾尊夏近採摘堪鮮滑取下
酒可以資清譚只憐季鷹老我歸猶懷慙拂衣丁暮歲
芸局本不勛君方返承明西掖當朝參草詔入禁篽人
鑒藉指南豈可蕩兩槩流連向空潭尊羨未下豈本性
我所諳秋風尚違時嘗恐食不甘去去典書命文富原
非貪待君事功成對酒看山嵐

題青園廬墓圖

有序

江閩孝廉圖其父青園公為祖尚寶公廬墓索子以

詩

孺慕不可已居廬傍泉臺自昔誰最稱王裒蔡伯喈今
者青園公哭父如嬰孩負土既已就築室倚樹櫟攀身
見枝枯滴泪成土灰吾友孝廉嗣為圖誌餘哀徬徨著
草笠手指寒林隈云祖尚寶公千載從此埋丹青有時
蝕丘山有時隕惟彼廬墓人天地同昭回

送史上海之任兼示舊明府暨伊兄婁縣

滬城傍東溟本屬舊游地良友將之官抱此瓌璋器舊

尹吾故人為治軼俗吏

天子嘉其能召取置殿陛棲鸞豈無羣馴雉真足嗣况
君乘風雲天路可坐致黃浦環城闥丹花被庭砌難兄
宰婁水相隔祇埤垸此邦羨堂堂繼至有難弟同時府
中趨千載生嘆異攜琴向雲間贈鞭送行騎他時返承
明吾友見前事

寄無錫吳明府

憶昔游延陵常登夫椒山慷慨懷令君高雲相與還就

視獲良契茂承歡顏飲泉知其清置身東峰間把弄
不忍去宛若冰雪寒迄今逾歲月七見山花丹相思寡
言訊欲奮無羽翰竭來返梁苑延憩從近闕夫君惠化
洽比部能相安津亭共車乘隴畝偕盤餐初為典使召
星輶起追扳繼為負土行而且卧轍環翟相制未復冠
公留多端與民一家人賢哉居是官今茲四征起羽檄
紛河干祇恐念方叔徵輦來嘽嘽我本羈旅客中心戀
所歡臨風寄微言三覆增長嘆

秋夕詩和益都馮夫子韻

朝登青綺門暮宿白楊巷為從南郡遊
塞帷總成絳雲開逗秋陰雨過揭晚虹
夫子鐘鏞姿含響待筵撞勿因宋人愚
而棄仲宣躑躅碧梧嘶涼蟬白露時以
降銀河亘長天入地猶淙淙

賦得秋菊有佳色

康熙甲辰重九雲起閣登高賦也分牌得鹽韻先有律祇

複鹽字

緒秋敞晴曦百卉揚素纖況有籬間葩
藹宜幽瞻零

露日以下玄霜日以嚴佳氣發清姿澹影何檐檐東園
啓遐檻列種如抽兼持杯一相顧遂使歡好兼薌苾乍
蒸鬱歌嘯猶遷淹良朋共遊遨秀色時見添綠衣障黃
粉碧椀盛紅鹽我欲掇其英把手徒摻摻高天雁初度
日暮酒已醺徘徊玩芳華令我思陶潛

康熙二十五年予請急歸里自京門赴益都特
謁馮相公夫子恭呈八章每章六韻共九十

六句

元宰昔秉政降典手闢門舉召遍四郊牧豕來公孫惟
時試

殿陞誰與迪

至尊夫子搜隱逃構材及髡桷以茲離詭質濫被青黃
文掩映匏竹傍顧盼長啣恩啣恩託鈞陶砂礫就廣
治戴崇亦何人乃許食西庖只憐苦飢馳出入貫羸馬
但得隨春風摳袂自灑灑有時開袂堂集之萬柳下嬰
紱追上辰詠嘆振大雅大雅久不作姬旦陳農篇何

悟復明辟頓返南畝間

天子盛嘉賚宸藻紛披宣傾朝餞遙郭作畫標近筵迄
今課桑牧偃仰留鄉園鄭公自謝政避客已四年 四

年懷衮衣時事喟日易門士暨舊僚半作夜臺客伊予

本蓬根霜落見孤植逝將請長假還住賀監宅何當感

故年擁髻失通德

謂曼殊也

從此塵網中坐使鬢髮白

白髮

閱新序言至萬柳堂觸目憬物移流涕攀條長茂弘袂
猶在謝傅澤未忘時禽改啁哳清池變滄浪驅車稅北

海徒步詢鄭鄉所嗟不同攜豔歌亦何嘗何嘗識東

家遙望屈雙跗雲門萬仞間是我感恩處登堂式琴樽

入里敬草樹誰昔戀宮牆相訂共樊素

曼殊初訂同過益都

獨身

瞻天星咸嘆泣朝露千秋展斯須四顧謹翔步翔步

肅函丈詩書啓笈周游遍廊廡所至皆典型元臣本

樂志天語昭上楹

上賜詩有元臣樂志年語又賜適志東山四字印記因以適志名

堂沈宮詹為書額懸梁間詩鑄儼韋谷花曲勝杜陵時從前村歸不

記漁樵名夔龍在丘壑日夕稱太平太平無窮期景

運方逮旦東歸有康成早已受易算高天本寥廓叩首
日相見人生非圈豚安敢久留戀祇懼負師訓無以答
宸眷努力崇光景終焉戒游宴

寄贈陳山人七十

放舟過長泖遙望梅花源皚皚十餘里有如銀濤翻良
友徐允哲邀我遊其間揮手不能從至今勞神魂山人
穎川後結屋繚土垣讀書博墳索懷寶藏璵璠遺世謝
人染觀古究天根有時負杖立獨與趨鯉言梅花正開

時栗鹿駕短轅京華埵座中愛梅過芄蘭迴想下沙浦
花開滿丘樊君子畜祕術青芝當朝殮加以抱璞授七
十存真元我欲窺至道卜築申江園慷慨寄一卮聊與
志勿諉

梅東渚築樓于草堂之北施侍讀題曰滿聽其
羣從淵公孝廉首倡二詩書卷命和遂依韻
率成續原卷後

下直出中禁懷人在東溪豈無逢時交願與靜者期如

何鬱儀轡日薄還相羈環山如春白入路逶以迤傳聞
巖牖上重屋方臨卑虛似撓千空泛若坐百陂所喜朝
日麗有鶯啼修楣樓成時有鶯啼于梁以此屬清聽能使神志怡
君子畜嘉告同聲寄遙題何當攜雙柑倚此雲外梯

二

披圖鮮周游蠟屐用幾兩惟此林間人于焉萃清賞逝
將與晨夕浩然學長往詎無臨淵思徒抱結網想一旦
玄暢成噫氣激疎爽萃律森似雲長林坦如掌遮令萬

籟鳴雜作衆山響有時秋風生南還重相訪比之剡川
賓乘雪鼓兩槳于斯理高吟憑欄且俯仰

書簡末寄徽之大敬二兄

鳳城新雨餘涼氣襲衣帶濺濺銅溝鳴宛若水下瀨何
為坐煩縛宮漏日相待

新功令每日赴午門坐班

故園松檜間灌莽

迷夢對我有老同硯名者徐與蔡奇文婦人荒高矚出
天外投簪願追隨欲去轉留礙長跪作素書飛鴻渺何
在

送李檢討子養還山

招弓下中山，葺屨朝上京。
公車何崔嵬，所藉高世名。
志氣本超卓，文藻亦縱橫。
誰言紫閣翁，少小無宦情。

至尊重良會，召見開延英。
食以朱貝杵，沃以碧筍羹。
給札令呈藝，轆落無弱營。
因之授冊府，入署承明庭。
夏雲方南馳，夜火將西傾。
一旦上省養，孝感動。

聖明啣軾謝京邑，衣錦投鄉程。
祖帳各擎攬，反若千里行。
人生有初服，亦欲莫所貞。
何為坐拘牽，悶志徒怍怍。

二

園鑿不受杻桮枝豈為輻況有終南行白華蔓空谷曾
參着兒冠虞氏就養屋渴借桑門瓜甘懷洞庭橘昔有
捧檄生色喜逮親育今我亦何為但指風與木蓬池畜
嘉魚得為親釜熟迎養曷不可遽爾返邦族白衣雖改
繡披之當萊服碧山張學士當此悔解幘天涼賣漿稀
官邸日不足臨朝思貽鞭無馬堪競逐但詠南咳詩雙
泪下簌簌

三

太華有佳氣乃在龍門山千載啓石室一若通武關盤
岡與繡嶺隱者藏其間況復踵靈異於此產馬班當今
居史宥疇職筆與刪翳衆多匠手而予猶汗顏維彼粲
門子高踞蘭臺端慷慨忽棄置躑躅誰躋攀柱下去一
宿撰事留五難有論責韓愈無書報任安新秋坐林薄
仰看飛雲還牕通紫微遠戶傍太乙寒日月過欄隙晨
夕躬庭餐視此三寸擾何如一日閒予有湖上業濫漱

通周官思以割一曲未敢徼

聖權橫門出祖道藉藉皆來觀徂彼前史賢相顧增長

嘆

為聶晉人題學釣圖

呂望不賣漿公子乃垂釣當其投竿時相顧尚年少清
姿比晴漪綠髮等秀萼違時起長吟所念在遠道叩首
解博衣洗足脫行幘平沙浩茫茫斥略當晚照著線牽
素漚楊葉蔽枯潦豈無臨淵思魚美不可罩因之戀清

流揭手把長篠十年行天涯汙漫摩所造乃猶乘下澤
拔輪出泥淖我從長安還將以隨荷篠每念素心人把
臂接林隩逢君明湖來貰酒勸一酌披圖見疇昔展卷
助吟眺所嘆俯仰間非復舊時貌花開應重紅綸絕可
再紉逝將溯滄浪慷慨發高嘯

為家會侯題戴笠垂竿圖

迢迢新安江上有龍門山君子居其中名滿四海間披
懷似錦繡落筆成波瀾結組騁遐軌矯矯不可攀夙昔

有男子把釣垂琅玕羊裘澤雲碧龍卧山花殷千載仰
高躅何處堪投竿崇臺出天際歷落星辰寒披圖倘能
追日暮相往還

黃鵠篇

出郭有
訪留贈

黃鵠志千里遙矚青雲端相隔纔咫尺曠若溟海間君
子秉高躅守身如璵璠奉簡作良牧所念在民艱煌煌
敷奏時久已策治安康衢一以邁幡然却塵寰香山鑿
八節將與劉白還赫曦照林薄徂夏增鬱煩清霜戒前

塗倏及朔氣寒城西有精舍去作逍遙觀慷慨不得見
令我凋朱顏達人覺變化金門借泥蟠況當被宣力藉
此憂與懽溯洄幸相從俯仰同觀瀾長風自西來肅肅
生羽翰

九日陪馮夫子登善果寺毘盧閣和韻示同游
諸公

秋陰敞金罍朝日離羽嶠神都融清光佳節乃游眺司
袞請澣歸後乘載同調師門舊簪裾命駕絕呼召旨酒

敕趨封肥炙鵝與爆貽糕作炊彫賜橘代銅毛但惜金
臺傾望古不堪吊此地有寶坊高閣宜晚照憑欄試一
觀縱目攬衆妙浮屠鬱崔嵬金碧麗衆教層垣翳松柏
隣圃通竹篠西山飛蒼烟空翠相映曜沉復鈴塔間烏
雀暮來噪故園有黃花被之幹山隩採摘無由通虛憶
在遠道詎意侍芳躅丹梯迴能到豈無參軍狂不用拾
烏帽蓮堂靜坐時宛若陟高峭何當據層霄慷慨發長
嘯

康熙十七年七月二十八日京師地震大厭

朝廷下詔修省羣工休惕予以謹戒之餘竊讀政府作

續紀一首和益都夫子韻

維歲在己未彛則月將晦京師忽地震廬舍多損壞有
聲自西來轟作萬鼓搥城壁樓櫓間擣厭若碓礧是時
塵坌涌白日飛黶黶搖動及通路遠過涿鹿界如是三
十日爰爰餘砢礧不啻宋渭州四震瓦亭寨

天子起爰修省下詔布罪悔羣工亦憂虞敷奏各創忝伊

予本韋布初進即求退況復職筆札所愧無補人既鮮京
易學誰擅子政解填陰與沴土相習總昧昧但道何物神
得撼此大塊憶昔本始年漢世當盛會震厭毀皇廟河上
警至再詔令內郡國舉若杜欽輩直言能極諫因與陳利
害方今復制科茂才鬱繁會大廷倘策災何以置明對道
人振木鐸惟在謹天戒撫此修輔文永夜不能寐

題靈鷲逢僧圖

白門烏帽生丹花駐雙頰尋真向靈峰迤邐看秋葉奚

奴負錦囊左臂挂木篋海鶴梳顚毛神駿理壯鬣老僧
坐洞中自顧能見曉仰天驗碧甃俯地露灰劫山童報
客至徐起支步屨覲面若素心忻然笑相接問客從何
來飛飛指黃蝶

送張邇可還里用韓退之送陸暢南歸韻

夫子擅駿業卓犖饒人聞披襟對天安氣辟仗下軍論
達得种嵩詞雄比崔羣階前雁羔集戶外車轂紛共言
天子貴無書禪云云誰為翰林者當此硯欲焚乃者西

都賓長懷北山文長夏厭暑雨高天矚流雲京門老同
學把袂不忍分感深語方轡義激酒易醺衰年戀鄉邑
刺促如蠅蚊何當隨周磐流涕還汝墳

方貞靖祠堂雙白松卷子題後

昔有軒轅松皜質如傅粉雨實裹霜濡數榦合一本其
下穴甘液有若禾在囷以茲賚嘉名謂為藐姑塤磅礴
與柜格當此俱自損何期數千年貞靖發孤憤我我尚
書郎秉直如郅憚殺賊志不詘絕食遂甘殞首陽與華

池兩兩接車軫居人表忠節祠廟日惟謹階隙樹佳草
所以護欄楯何者作蔭樾蓬蓂蔽前阪惟時太史園五
粒方兆朕移將未拱把纖若織籬槿俯仰甫數載枳句
漸圉蠹迄今閱二紀鬱作雲蓋偃風雨自崔錯鱗介亦
蜿蜒青鸞并黃鵠一一互相引瀏蒞卉歛間號唳儼叩
牝斯非徂徠山亦異石門吟蓮城種俱遙衡嶽望斯盡
幾見灌河植誰則荷土畚得毋有神物呵之使安穩前
賢布徽烈所賴繼袞袞睢鳩得遺式百度見繩準圖畫

及詠歌務在令不泯況當蒼蚪枝白者等芝菌何易雙
雙列衰葉類茂苑貞心不可回勁節不可挽藉此霜庭
柯可以告久遠

許使君詩

不唱鳳來曲不歌虎渡詞鳳來會有因虎渡將安之我
有許使君皎皎神明姿生乘景昌運出應忠良期生民
賴保障庶服膺藩維分節守外閭巡軍付中司初控五
馬行既展雙旌馳心明比冰鑑道直如朱絲化物凜三

異介德凜四知寨帷問疾苦振索哀惇嫠遠近各有望
上下兩不疑方其守越州適遘張王師調士滅虎竹行
陣祛魚麗順者既懷德頑者亦畏威一朝秉憲鉞盜賊
不敢窺隣郡假敕剔此邦藉安危惟余本鰥生漑澤叨
恩私僵魂起榮拂枯骨生華滋俚歌雜謠諺未得展素
思但望峴山顛泪下如縷縻

西河集卷一百八十五

欽定四庫全書

西河集卷一百八十六

翰林院檢討毛奇齡撰

五言格詩二

別伯兄五首

孤鳥辭宿柯離獸馳舊林驚心見曲木走險不擇陰判
茲同生子惻愴誰為心如何彼蒼天使我邁難深邁
難未云極三載慰遐慕如何復離分悠悠即長路遊子

多苦心況復值秋暮絺衣薄寒颼葛屨踐涼露揮手自
茲訣一步三反顧反顧不可行回身復牽衣慈殯未
旋墮嚴車復停幃門戶值中落各鮮庭樹枝連岡隔秋
照影亡形亦疑暫竚覲形影及此將頽曦頽曦將右

匿流影眷左疆孤雁雖西飛其音在東湘君子重去土
豈不懷舊鄉形隔不得旋魂魄思茫茫生當從兄游周
我門東塲死願為飛鳩鳴此道上桑桑梓在道上猶
然起繾綣析柯解連枝豈不極哀戀念兄富文府弟亦

擅華絢三珠秀稽林雙龍起江甸兄既辭司秋仁人不

為讞

兄已除理刑
推官棄去

弟復遭百罹中年起更變天高殫難

呼道遠死誰見疊浪阻潮汐重山蔽鄉縣茹藥苦自聆
詎敢告親串兄年已傷哀無為久勞眷努力紹前期揮
手泪如霰

王貞女詩

有序

康熙中吳江王自瑤許字同里蘇生未歸生死自瑤
年十八截髮守節既而姑亦死服除請歸之蘓母曰

豈有以無夫而歸妻者耶自瑤曰死者吾夫也夫死而代夫事翁則夫猶未死也不然吾夫在地下請歸之地下已耳有何難焉父母知志不可奪遂聽之丁巳三月二十七日蘓迎婦如禮自瑤乃加髻與父母別蘓遣小姑迎于門自瑤乞撤綵止樂始入是日雨雪遠近來觀者皆泣下既升堂後拜夫影哭畢其翁感其義令不即以婦禮見先垂涕西向拜四自瑤亦垂涕北向答拜四然後成禮時自瑤年二十有二吳

中人多為文嘉之子過海上顧子茂倫屬以詩乃仿
樂府辭應之云爾

黃鳥交交鳴集彼東南枝私顧無匹雙誰為好容儀有
女秉貞素家在吳江隈十三能織素十四學裁衣十五
弄文翰十六誦詩書十七備箱簾紅羅刺繡裳頭上芙
蓉髻耳後明月璫足下雙珠履行步爛生光將作合歡
襦上畫鴛鴦與鴛明月有時翳芙蓉有時委合歡終無期
鴛鴦空復爾阿女前致辭兒已得所親非謂得所親黃

泉願相存擣盃却苦蓼從舊不從新冶金作華蓋到底
無翩翩駕我青牛車綰我綠玉繩逝將為彼嬪入門事
尊章惟時毋聞之相顧起徬徨本謂相君子百年永無
疆何悟廩霜下拆此蘭蕙姿鴛鴦未成匹何敢言雄雌
芙蓉生兩岸那有並蒂時人生若朝露柯換葉復滋況
今隔年歲四載尚不足三載頗有餘舊火既已改新穀
屢見抗其家且無姑老翁獨閒居阿女含泪答所以不
即歸吉凶不同行今既凶服除自可遠父兄少小通文

史兼復誦詩書詩書雖無此文史聊以為為夫入子舍
謂復理所宜寧有升筭女終老于中閨不然將從誰從
夫下泉臺母知女志決為女理容粧便可擇良日車駕
來相迎車前百枝燈車後龍子幡小姑到門迎新婦入
華軒着我新嫁衣事事相週全頭上何所有鬋髻雙梁
釵足下何所有織履躡素絲腰間何所有襖複結兩頭
車左駕青鸞車右從文魚本謂坐華軒雙雙共翱翔何
意牽紅絲獨身克後房到門撤鼓樂行步將升堂是日

暮春天百花園中開浮雲障白日寒風為之吹須臾霜
雪下牛馬皆凍嘶觀者皆有嘆行者亦以哀桃花冒霜
雪何得施臙脂阿翁拜前庭新婦拜前帷中堂兩交拜
各自成禮儀雖則成禮儀浪浪汨雙垂自古通婚媾未
有如此詞此詞有時盡此事無終衰將詞記此事當令
後世知

贈武孫

姜生擅奇器少小稱文豪十憇柳樹下無汁染子袍擔

簞逐主父浪跡為名高出入長安中造請滿市朝有時
快落筆掣電驚兒曹萬言中時要遠鑒比灼龜純釣具
新割安用矜鉛刀黃鐘雖未鳴猶足震鼓靴生平主文
玷高會東南交冠蓋遍五都謂此非久要獨予邁京邸
仍眎漆與膠甫嘆伏蠓久數歲淹土坳豈期神鰲升一
旦騰雲霄君家本世閥七葉盡珥貂趨庭與羣從早已
先鳴鑣一第豈足重斯意原囂囂但念丈夫志卓犖貴
自超何為坐窮困愁嘆生無聊不見燕冀馬千金在名

標不見北溟魚為鵬以逍遙

寄李制府生日作

使相授節鉞開幕東南疆征繕行表貉杖策入戎行潢
池會丘變甌越多叛亡賊旆下姑蔑獲索近括倉丈人
師貞吉鞠旅必有方召虎鎮淮服杜預恢當陽嬰城并
搏戰威驗如秋霜保障此半壁一若金與湯惟時就壇
拜絕席同親王翳仁克佐賢擣虛而憂亢臬雄既懾
伏虎衛爭騰驤礮礮漸底平鬚髮已皓蒼迄今刷介馬

桺刃三衢旁軍書尚倥傯門櫟猶恐皇君子被儒服所
貴平披猖畏威并懷德不在稱有光伊予本編庶竄處
負痛創蒼頭久奸旗白騎尤抗梁非公翦驕悍誰與戢
斧斨況當炎崑時玉石不得妨撫卹儼慈母衽席周匡
牀方碑一以涕奚啻在峴岡予職忝史氏將以書旗常
天子方倚賴仍使鎮上航當其始受脈膂力真方剛今
來邁花甲歲月亦已長薊門隔千里所寄惟清觴微言
當民謠聊以誌不忘

聞王生新除行人有寄

春花發青瑣天閣動遙翠之子甫拜除暫陟介人位古
賢重行已不辱乃其次少小克朝集何止學專對所以
碩玉節貴在伸國契誰謂乘軺車僅載爵里刺況君有
世德立朝建風義藉此嗣駿烈且以繼其志寧效江南
使拔草進烏昧母若潘孟陽慷慨但遊寺

奉餞趙中丞之任杭州

神魚游溟滓不與鬚鬣羣黃鵠翔九霄燕雀徒紛紛伊

昔秉人鑑九格定世勲奉使掌鑠院曾詠江東雲嗣此
赴

中召出入建禮門聯轡共丹陛酌醴同清罇一朝著風
采慷慨承

宸懽令作九州長六纛開崇藩內承弓矢命外秉鈇鉞
權歲星占所麗金牙駐臨安吳越介天險鳳舞龍亦蟠
昔為臺館交今作編戶頑單車出都亭尚覺霜風寒

王學士出撫兩浙旋以閩越新定開府其地予

遇于福州行館極蒙贈饗賦此抒意

憶昔直史館下馬東華東夫子秉裁鑒視草牕日紅一朝膺寵命出使為儀同胥濤驅萬隊轉見幕府雄方州領節鉞草木皆生風百官避衢路四譯藏甲弓伊予有部屋編在封田中高天無私覆但覺雨露濃被廣絕邇逃倚甚同穹窿如何驟移軍重令甌粵通金湯藉開基銅柱將銘功浙人獨何辜奪此履戴崇今來展私覲澤國瞻軍容聆茲鉦鼓肅饗我酒醴豐仙山本嵯峨鼇海

何滌浚感深莫能酌慷慨長拊躬

題括倉劉在園使君記年圖

景星曜天衢有目爭快睹況當泰華峰矯矯出雲霧夫
君本顥質少小名四布對策軼董相稽古邁桓傳幽棲
弄文翰好作遐覽賦因此守擇山名與李繁伍今來明
湖濱籌大實借箸翻以願受廛藉是展遐慕青天覲修
容碧巖藉高步黼黻猶在躬光彩灼眉宇蓬池曠莽間
水草恣洄洑中有鯢子鱗相視等嶮嶇曩者千頃陂汪

汪羨叔度展卷一以思伊人渺難溯

送劉考功請假歸淮安兼示令兄內史

劉郎擅東曹吏事稱第一
比士閩海歸浮譽斥柳七一
朝請沐去將理淮海絳舉朝競貽鞭
過市罷彈瑟此去戀鄉井兼及好風日
首曹設長名終以待執秩風昔曾
浮淮登堂覩作述朝讌施酒漿
晚食授饌餽于今二十年
同朝頗狎暱難兄甫待詔行選
蓬島室春明俟君來
壘麓共均律祇恐秋風高予早
趨歸鴟六翮翔上林中

途莫相失

恭餞馮相國夫子還山

神蚪迴大澤威鳳翔雲間君子秉耆德淑世饒令顏植
躬表黃闥正色垂朱轡道足慰三紀勇以定百連中司
攄台鼎遐海銷神姦啓心占

帝沃握髮為士前譬彼天地闢萬物咸陶甄已舒禹臯
烈始引黃綺年治定當明農功成乃歸田且從養天節
豈為避世賢

二

經德凜端右致身在虞唐言可當人監行久作士坊瑞
氣炳六符道精涵三光私語祕溫室公績留太常維彼
宣聖言善用不廢藏召奭別姬旦伊尹辭成湯都人恐
公歸旦夕瞻繡裳啣詔汎太液載酒遊林光橋虛接瑤
版洞曲流羽觴須臾灑

宸翰雲漢回天章使官衛前途乘傳還故鄉借問西苑
游如何東門張

三

夫子本聖相晚歲懷巖阿曠度有如雪碧髮尚未皤三
山集土壤九罇資網羅代已繼疏仡治豈沿共和有時
坐一室兩膝容不多顧景念蹶躅初志憂蹉跎奠邦儼
磐石涉世同流波城東種萬柳長條拂岬陀閒來集羣
賢予以永嘯歌逝將邁東山蠟屐投林柯高蹤固難攀
當奈蒼生何

四

在昔裴中立乘興歸午橋何如二傳去餞之在東郊處
宦若家室投閒亦京朝所以鴻飛冥千古羨羽毛上宰
展一德弘儀冠諸僚幡然懷鄉邦遽爾振沈寥日者布
文命

聖心擢賢豪既資

殿廷舉兼藉郡國招夫子較詞業燭照如龜燒以此文
價起卒與

睿鑒昭今茲且繫維駕言食場苗牽裳攬紳帶卧轍填

沙坳會應棄碧組同返青山椒踟躕却立間一望空雲霄

永寧程母康太君死賊其子乞興安兵復仇興
安帥嘉其義且善相術謂他日當代已領此
衆後果然康熙甲子同館翁太史作詩誦之
屬子和歌

澠池有烈母忼慨罵賊死其子行報讎殄賊雪其耻當
時感孝行奮迅礪穉齒豈期哭秦庭頗遇姑布子形在

旄仗間早已識前此一旦列頗牧正值彼故壘曩時趙
苞孝以母膏賦矢何如全令名揚顯自此始從來表至
行彪炳賴藏史為讀清風吟三嘆不能已

題宋母方夫人傳後

宋母封股行孝其子姓兄弟觀感繼起者凡五人

宜家不私已大孝乃致身沉當一體分骨肉同甘辛賢
母秉亮節事姑如事親刲股嘗縷切和糜進殷勤中間
療君子委篤良自振以此感至理數世咸相因子身可
事父弟身可事昆往嘆聖教衰民散在彝倫痼瘵不相

及邈若燕與秦敢言勿傷毀手足當見珍悠悠保軀子
誰謂非完真

錄別詩

綠蘋被叢薄紅蘭覆江臯掛席浮海濱言渡枉渚潮君
子秉遐契相顧稱神交一見贈縞紵再逢貽錯刀芳辰
羅廣宴永夕傳佳餚旨酒滌中脘爰以散鬱陶春鳩度
麥葉暑鵲鳴桑條危檣駕五兩風便速去橈離歌未終
曲別思如波濤嘉德許攬佩隆情鮮紛囂良覲安可幾

所恃在久要

寄贈宋使君榮通薊行署

平明出東華秋色亦何有日照宣曲花風吹掖門柳使
君擁朱旗日飲潞亭酒寒蟾吟高槐詩興倍抖擻伊昔
對建禮螭陞羨趨走相隔僅郊閩宛若間丘阜天涼懷
家山歲宴憶良友何當道元州因君贈瓊玖

留別朱在鎬司李作

仲尼適泉源嘗主蘧伯玉我今遊海濱望門向公叔衣

車稅前除將就廡下宿主人出未歸四顧且踟躕其家
一何賢開軒啓醺醪繁花發園桃鮮筍薦牆竹日景方
紆徐風氣漸烜燠幸逢主人還握手道惆悵如何復出
門方駕不脫輻予住三月餘三見征且逐一如予汗游
虛覓升斗粟我聞司馬公往就鹿門曲主客恒不分相
向以為樂何悟千載後重得覩斯躅從來沛國屑歷禪
富賢淑況君早蜚聲文譽振邦族曾授司刑官所讞無
枉獄暨乎拂衣還晚食幾斷肉春草長及階夏雲覆如

屋游子思東歸慷慨夜擊筑一念賢主人雙泪下撲簌
奉答張檢討鴻烈南還留別原韻

憶昔游東湖同賦明河篇酒酣一揮手翕忽三十年碧
流徙滄海白髮凋朱顏何期會公車對策隨廣川抽毫
共深禁作史分長筵把臂慙疇昔聯轡課後先誰令叱
獬犬私愧同寒蟬多君秉謇諤慷慨陳

殿前但謀救里青豈為裕國泉

聖明早垂鑒既已行其言旋作歸田計解組還舊山我

本乞塋親請假還流連君行及春晴先買通路船聞君
有別業遠與東胸連其山名鬱洲溟海相廻環中有良
田疇仙驥曾耕烟移家暫棲止任使歲月遷江東無官
湖何處溯潺湲他年倘相思一望雲海邊

丁給事典試兩浙枉訊奉答時予猶子見舉門
下

維昔歲貞始文昌曜南離丈人效鵠觀四海以為期高
舉翔寓內乘風到江涯藩車下蓬華熊旆臨蒿萊爾時

恨陶室未足安范達設醬苦虬薄莖薦知馬飢一朝升
掖垣相隔猶雲泥引身跨鳳翽叩額當龍墀上殿展十
論直聲著邊陲會承華文開有

詔典浙闡青簾散日映紅燭迎風吹至公誰秉筆恍見
珠斗垂嘉祐斥蕭穆元和邁昌黎不謂猶子愚亦得掇
草衣仰瞻泰岱高四顧乏羽儀潢汚隔滄流何以慰中
私豈期度寥廓握手相追隨天地有餘量日月無常規
但言駕逍遙鷺鳥安足知

九頌篇奉贈梁大司農夫子并祝初度二十一

韻

結髮學儒術負篋為遠征父事言子游兄遇延陵生文章
頗濩落意氣猶縱橫但恨日垂暮所志百不成捧檄入京
邑仰望天階行牽車類趙壹懷刺同襴衡誰信九州大及
見三光清老成佇朝右明穆秉國經峻節凜聞式微言驗
章程容物善下士久作來者型蒼巖高萬仞中有黃金庭
俯視恒華間宛若丘與陵名世不數出斯代誰賢英敢與

東丘違而令北海輕矧予依孔牆晚歲斟堯羨每當皇覽
日願致歌誦情祇慚肄風雅三百有正聲何為雜衆竅百
變煩嚶嚶尹吉自清穆史克終和平即此九頌末孰與六

義爭不觀蕉林詩千載垂芳名

司農所著詩
名蕉林詩集

奉和益都夫子讀孫司馬韻書原韻

折竹作鳥書所藉在都講不虞聲未諧齊陸導魯港古
有司馬韻皎如月在蚌豈必窮毫毛祇貴挈領項何為
守一閔紛紛坐投鋸

金副憲遷少司馬舉子有贈

煌煌帝庭宿歷歷轉玉繩天樞近三能鬱為萬物精之
子冠柱後獨坐秉憲衡殿中中執法封事多能名天下
望風采內外皆肅清

至尊獎遺直特進掌七兵
我我少常伯奄作西曹卿
八事既條奏九命方出膺
制軍及飲飛詰禁予以并
爾時正垂弧寶樹生中庭
已協夢熊卜沉聽遷鳥鳴
大德嘉邁種所志傳一經
華纓接芳影永為斯世馨

西河集卷一百八十六

欽定四庫全書

西河集卷一百八十七

翰林院檢討毛奇齡撰

五言格詩三

有感為雲錦詩

并序

曩者傳長虞謂素絲有杼寒女難工郭泰機以寒女
衣絲未經秉杼兩皆失言夫機絲經緯寒女之能事
玄黃黼黻貴工之授裁寧有素絲皎皎當戶無機東

杼未工衣裳燦燦惟夫秦川好女日對流黃河畔諸
姑時支彩石亦既煥文章于黼裳啓經綸于筐軸而
七襄不尚于敝紵六繪不加于敗帛雖王肅有妻蠶
絲可續而石崇之婢澁布難縫越葛徒勞不施蓬首
魏尺雖美未量寒體是以每睹記夫當機輒有傷于
雲錦

煌煌雲錦段本自貧女織貧女不為衣札札空費力丈
采煥經緯裁割被珪璧豈知機上人抱杼每唧唧丹絲

與素絲各自理容飾織錦得被素誰為理刀尺蒼天綯
雲霞當牕散餘色流焰貧女衣一顧三嘆息

江橘何累累

江橘何累累葉妍實亦嘉遙林布冬榮歲幾遍江涯南
金冶成色東珠綴為葩青時已結綠丹者還流砂宛如
層陰中參差點輕霞我食南中橘數載曾無家自慚徒
作頌不能復懷沙區區飛蓬姿何由間修麻逝將抱長
耒種橘藏金華便與王郢遊勿羨子母瓜

重經上江過小孤山望高良作

晨颶解流潮朝瞰圻遐沚中流辨孤嶼相越尚百里流
峭去榜逆颶迫來洲駛忽泊斗巖下遂至洪澤裏三江
檐前期九派殊昔理矚異物不延時遷景為徙滌水掬
流清塞花摘葉委羈孤汎無常流浪詎有已寧當越前
峰去逐高良子

寄祝淮陰蔡母徐太孺人初度

淮陰有賢母教子如子興朝探玉笥訓暮讀金檢書結

交滿人間曲巷多停車況當草元成家有問字廬我嘗
客淮陰拜母戀階除雙髻映霜雪兩頰開芙蓉俯首聆
教言一似訓子愚今逢設悅辰遠隔天一隅殷勤寄霞
觴彷彿同追趨丹山九苞鳳噦噦能將雛坐待羽翮豐
文彩橫五都

送姜京兆之任奉天

朔風吹長旗旦日耀嚴裝君子奉明詔叱馭遼水陽嘉
績著圻甸賢聲比張王念茲根本地曾見蛟龍翔因假

兩省貴爰展三輔光高江蔽鴨綠大府開熊黃隆冬播
弘澤能令草不僵私惜離子舍何以慰高堂忽當迪

新恩子弟皆騰驤

時其弟與孫
皆舉于鄉

獨子託末契願服前車

箱一攬山海勝再觀邊塞長第恐冒霧露以此留傍徨
郵亭張飲餞予亦持清觴臨岐無所贈聊獻肺與腸賓
雁倚南日翮鳳鳴東岡相期策榮名還視湖海傍

總憲徐公以掌院兼史館監修奉贈一十四韻

古稱中執法但畏上殿爭自公入南司郡國皆澄清率

屬謹鎖鑰以實不以名我我總六察見事真風生從來
陳正志能感

聖主情何況彈新參動使羣寮驚朝陽有翔鳳忼愾時
一鳴君子秉至德緘嘿豈所營特念蘭臺官舊本通承
明以故東觀書仍得藉鑑衡太微當嚮曜所麗惟四星
秋高肅禁令不止象火災主憲得正士視履歸章程誰
言唐子方僅在著直聲

奉贈許使君夫子兵巡閩中

往者吾夫子秉鉞開秦稽正值朱買臣闢地東甌時戈
船出漢浦下瀨通金嶺荏苒符並竊發守者誰與治夫子
擐甲胄白晝曾登陴羣盜跪投戟涕泗垂頰願今茲簡
節度方重東南陞誰敢輕綏要而撤蕃與維乃以烏坂
北六羽標幢旂仍屬會稽郡同在天一涯自昔惠愛及
願借相因依何幸歲星被照耀無兩岐小子微鷄薦比
之漢孔禰況望南鐔州劍氣長追隨分班侍

九陛親見

賜襲衣第恨出國門未得持鞭箠此行藉保障端賴張
以弛莫謂海波平前路猶瘡痍

錄別詩

上海縣作

修景返北陸日馭揚赫曦游子思故鄉嘆息將東歸伊
昔來滬瀆春花滿前墀主人出美酒式飲歌底幾出入
並車轂言笑同嚶咿啣鹿饗草草得食還相遺朱明變
新候丹葢舒故枝繫駒有時解結心何能移況君久仕
宦閱世經嶮巇慷慨已投分從容且隨時古人輕三過

言救溺與飢顧予亦何為茫茫向天涯越人盟車笠旦
旦申素詞今茲念崇情信誓安可違薰風吹廣術中道
惜解攜願言愛景光千載以為期

康熙二十九年越郡大水蒙郡使君李公盡力
疎救稍得安堵贈之以詩

於越本澤國春夏水瀕洞洪流擬懷山濩氣且啣棟先
是坎未發大禹早見夢謂有涖水至晨起決坊壅三江
廿四閘一闢二十洞

使君先數日夢神禹告大水至因預啓三江開以待之

決日

風濤生蛟龍偃衢衙公乃披髮救仰天大號慟云此實
予辜豈應罹民恫疏堰斷魚笱掘地展龍峒所幸急胼
胝猶得厖播種苗山有神經大者載禹貢使君肯隨刊
千秋仰鴻綱

北征

秋風生前塗白雲興山阿車徒既沉瘁我行勞如何夙
昔戒于役行行遍江河東觀越甌蠻西顧接岷嶓煌煌
舊京洛累足不敢過何期奉明

詔良馬紕素紕縣吏趨里門徵車敢蹉跎朝發長淮流
暮宿清濟渦廣畎化黃熊野寺名青駝常恐冒霜露無
以答誠和所期邁明良尚與賡載歌

奉

召赴都經泰嶽遙望有作

朝日汜暘谷孤光動天門鴻濛啓青蒼仰見喬嶽尊鬱
若顯氣接下與浮雲騫羣峰爭嵯峨拱列同星垣我欲
凌絕巘俯視周大寰奮迅鮮羽翼屺嶧難攀援從來聖

神出升陟柴以燔五玉覲國后三觀窺河源今適邁王
會將策明堂文下詔召博士因之及公孫自笑圭華士
敢為封禪言神功發眺聽博議開渾元但當入林丘揮
手長松間

二

風昔愛天孫層霄踊雙足俯仰志不遂高卧滄海曲結
念周八荒扶輿久脫輻垂老始被徵一憩梁父麓崇崇
倚重雲白日繫匡谷欲吸沆瀣漿頗頰慚滿腹我有雞

斯乘躡嶠如駕陸入林招洪崖望海誚徐福折取東峰
枝間與夸父逐歷嶮理自明升遠象以矚何為盼修塗
展轉愧寥廓

贈駱崇仁四首

馮生令丘陸安仁宰河濱灘沮非橫流聊以涵永鱗君
子挺珪璧既授文府珍發跡方西游改服亦南隣廣路
縱攬轡遵邁以上春上春子行邁徂暑予出宿孤羈
遘瑣尾竄身渡淮服嘗恐秋節厲揚飈及蕭燭回躬就

南離遐憇臨汝曲 臨汝渺遐憇將訪彈琴閣春草碧
如泣愁心復懷歸重來訊芳躅修組揚清暉譬彼秋晨
日新焰光襲衣豈無周周羽中道慰予飢寧隨鴛鸞翔
不與燕雀飛 飛飛隨鴛鸞燕雀難為羣與子辭同林
三載垂離分子為守官亟予為履險殷崇庠兩相接益
以慚譽聞寒商振長薄迴飈蕩高雲庶幾惠秋蘭聊與
揚令芬

太末見山花發春而林無宿葉

秋枿未解葉春櫻已舒萼不疑碧樹中遽見山橫落南
中饒榮陽百物鮮疎索何為逐流飈吹吹怨寒籜

別蔡大敬五首

朱陽當末垂邁患避人侶慘慘中夜別惻惻不得語高
柯靜吟颺星墮亦如雨行將出蘆洲與子且延佇延
佇不得去行子辭故鄉明星在天端晨夕互相望我今
辭子去不知從何方飄蓬追驚風風發蓬益揚飄蓬
隨風揚飛飛會有極江流去湯湯赴海自止息伊予獨

何辜坎壈久失職號呼仰蒼天
天宇為傾仄 傾仄天
影動黯黯夜將旦躊躇別子去
方寸已凌亂蘆洲積涼
露棲棲有雙雁哀鳴至天明
一雁獨離散 離散在何
所渺渺行難尋生死不可知
遺此經寸心南遊漲水濶
北渡湘江深倘遇洪崖子
惠我蘋藻音

雨雪曲

雨雪凍關城戰士久從行
邊風開甲滲沙日耀戈明銜
冰和糗糒燒火熨旗旌
不須吹木葉萬里作寒聲

和春寒曲

楊春汎初景庭卉謝薄寒如何越三變尚自愁風湍灑
澤易沾洽逾灌翻殫殘暫窺已亡緒改序誰能安深林
閉楚雀當牖披臯蘭風過雲不停雨止空還溥自聆索
居苦復嘅行路難依人喜遐附換服憂中單一聽春寒
謠三復增長嘆

壽方母七十

樅陽有名閥奕葉擅忠孝所藉母聖善恒凜冰蘖操當

其邁陽九夫子秉高蹈申包泣秦庭元節走海嶠惟母
三勗之不啻棄畚蓆沉聞覆巢警闔室薦荼蓼蒼天共
夷齊並受滂母教少小友哲嗣託契序長少恨未拜堂
下俯仰作視儆今來簞前史開館奉明詔逝將表孤忠
因之傳有道維母年七十壽考德彌劭三漿釀庭除七
誡著相與他時簡汗青千古仰德曜一觴寄南雲海鶴
舞嶢峭

送姜二承烈舉京闈未第南歸

相如薄園令少且以貨仕姜生游長安嘗挾監郡刺歷

世嬪仕宦惟恐失貤賜以此往借資少慰尊顯思

時方就試

預以資例援
監郡貤贈

一朝薦京國挂籍註名字有子先解褐同

詠鑠廳事

其子同試
春官有名

連年滯東觀籍爾通講肆頓思還

故園使我喪倚恃成都昇仙門歸馬如赤駟為郎莫嫌

遲晚歲得世濟武騎豈所安孝子終不匱里巷非常居

筆札有餘視春明望還來酌酒待小次

此日不再得擬館課作

此日不再得反景淪空桑扶輿復東馳漸辨顥與蒼晨
氣稍解散奄忽見末光誰謂歲寒子稽煖非愆陽善道
固多術力學亦有方當其送元冥惟恐迎勾芒須臾日
月逝進退兩不臧生苟好自衒物以材見戕況復嗜膚
理覆粒徒舐糠所以古賢哲幽谷能深藏疾視澗水下
靜聽蘭草芳南金匪為堅西鏐豈云剛銳進倘速退中
途反回徨明去光必滿源遠流自長請觀大道行坦坦
如康莊尼父造闕黨孟子收匡章小草能自挺莢稗總

在場因之起黿勉兩目如望羊譬諸斷乳兒戀戀何能
忘頑者必以振懦者亦以強任彼江漢流可以一葦杭
時俗厭菽粟不復耽尋常方寸偶出入難驗得與亡先
儒賦此詩惻惻多心傷謂此一念間所辨在聖狂

禱祀詞為李使君作

太祝掌六祈祠官重七戒禳祭與鬻辜所事在罔害君
子謹至治灾恤當倣忝匪為救壇壝祇以念畎澮齋宿
徒自責散致鮮遺念精誠一何深祝告豈能代邇者當

旱澇徒步凜禱賽神明果來通相覲在夢寐

徂徠篇

為兩浙
中丞作

使相夾樞省曾坐文昌臺中年仗旄鉞遂歷三重階赤
手搯半壁顥氣橫九垓因之八寶幢頻向東南開早歲
嬾駿譽清論超王裴席帽脫門下賜宴排江隈昂藏騁
天衢迴若龍與駉集賢借仙職冊府需英才海山舊屏
下陡坐鰲背低

聖朝重治術天牧驅黎鰥暫寄赤棘遙重使丹雘迴虎

績著方嶽詰禁留戎陔有時秉芻輓持節洱海隈比之
韋若劉轉鐔踰江淮旋令闢甌越下瀨同風雷開疆逼
扶桑溟渤生黃埃論功方刑牲宛與帶礪偕何期移高
牙兩浙儼具賅名都本煩劇草木皆煥煥幸藉一天沆
浹此萬戶孩丈夫砥勲伐所貴居陞隗出握九牧組入
植三公櫟譬彼乘鳳鸞羽翮爭毳毼治進虞共夏德並
伊與虺老成推壽耆其背尚未鮐不見千尋松蚰螭生
徂徠青黃并追琢鬱作樑欂材方其湛雨露偃蓋通雉

蜀誰知廊廟間千載同巍巍

贈俞文起七十

結髮與君游乃在桃源村青陽感初節意氣如朝暾說
劍事薛燭吹笛隨劉琨一朝會百六幡然歸丘園君同
抱璞隱日抄金匱言而我亦何為賣餅投齊門壯年俱
已逝綠髮生華根老鴉松頂落乳燕枝頭翻今年乘離
月值君考齒尊田豫讓官日克國征羗年諺云七十稀
君如日就暄況當丹竈熱服食能飛騫我持一罇酒汎

之以蘭蓀願君保令儀千載同歸元

康熙二十八年

皇上東巡會稽躬禱禹穴

臣奇齡迎

駕于五雲門外紀之以詩

皇情軫民依南狩省方俗豈曰展豫遊將以達衆欲無
如江淮間洚水濫渠瀆馮修恣潭沲安得奠四隩

聖人曾下視七州啓哀告一時抱殷憂兩面動衢墨于
焉導胡蘇不止榷園竹疏鑿三載餘創痛已漸復所嗟

未成功重煩駕輶輶仰惟前王賢神禹治海谷鳴尾示
遠卽應龍兆先晝隨刊遍諸方輯瑞會羣牧抑鴻下沉
菑灑地澹濁瀑其事隔混茫千載嗣芳躅

親裡苗山宮

躬禱石帆麓神獸方獻珍金匱將啟牘不憚鞭虹梁豈
為駕海屋何幸茲一方竟得先五服

聖皇每巡幸宛轉念民瘼不須登塗山爰載石紐錄

四嫂八十

少小侍兄讀事嫂如事母沐髮漑膏濡膠齒釋粒粒迄
今四十年滄桑變寒暑依然屬小郎坐語相爾汝予老
入禁近日暮類主父幸嫂尚强健鬢墨齒未腐兄嘗勤
國事有志不得吐所恃子若孫聯翩並鵲舉王者貴壽
考子姓酌酒醺沉當傳一經奕世能嗣武清秋有治牆
道遠難寄與但翦青荷衣暫作堦下舞

湖西施使君行部臨江予獨留吉安守歲獻春
過行署告別遂取使君原贈韻率和二首

放溜出山峽乘春下江畿晴雲盪汜波江草日以萋伊
予念行役三禩未能歸所藉覲明牧蓬稗相與依歲徂
滯枉渚悵若信誓違獻發將東還言別檐形悵生年寡
知音調苦和益稀過此一揮手涕泗沾裳衣

二

曰予阻遐薄冰雪嘗苦寒豈不惕搖落感此知己難捐
糜解食缺裂帛酬衣單相去三百里恍與同樂歡陽飈
發長塗昕日明前灘逝將謝此去歸泊遙天端君為山

上松方春積榮觀予視路傍草出地猶殫殘前期逐流
梗會合隨波瀾願因林間棲寄此雙羽翰

古意二首贈友作

好鳥翔何方衣帶胡離離一鳴經崑崙再鳴登咸池舍
景絜芳淑濯濯揚令儀紛飈起前途眇在天一涯高騫
絕廣遠結志還卑棲顧瞻扶鵠侶戢翮兩不遺東園有
高岡上有青桐枝與之攬德輝千載無窮期

二

南山有一木素枝綏摩抄云是千歲松倒生施女蘿輪
困復礫砢望望風節多歲寒薄冰雪偃蹇不改柯初視
播五粒再視揚九衢三視鬱層壑枝枝散三花借此枝
上陰可以蔽遠遐

蔡石舟生日

少小屏鉛槧與君事琴書避地東蜀間溷跡樵與漁中
間苦奔走相隔天一隅三秋鮮良訊四海皆友于聞君
訪名山所至淹柴車有時就記室託志偕阮瑜于今四

十年方歸南山廬朱軒棄勿顧華髮看漸虛行行遍天涯
刺此狂者軀性僻捐晚食興至圖春株故交散已盡舊
巷行復紆惟有王霸妻相將守門閤世事等蕉鹿物化
同溟魚幾見抱白璧而羨金與珠況曾友浮丘間道隨
方儲天地亦云寬不廢居且諸漫言去日多歲月誠安
舒喬松在高岡霜雪總不渝

西河集卷一百八十七